

Ranzmbanj Bya Heu Raemx Saw

贵港市覃塘区蒙公镇民族初级中学七年级 Vangz Moucwnz/黄茂晨

“Ranzmbanj gyaueu, ceiq gyaueu dwg raemx ranzmbanj, gyanghaet daengngoenz ciuq, va'ngaeux ndaw raemx ninz……” Gou ciengq dwk go, simcingz gig ndei, angqyangz bae rog dauqcawq yawjyawj.

Geij ciengz fwnmoenq doek gvaq le, ndaw doenghnaz, ndaw daemzngaeux, gwnz ndoilbya, cungj dwg heuswdsd lo. Henz dah song mbiengj heuoiq, gij saek de vunzraeuz cungj diuz mbouj ndaej okdaej ne! Gwnz nye goliux, mbaw heuoiq, gwnz nyeliux hai rim va henjoiq, gij va neix mbinfengfeng, doek daengz gwnz dieg henjrwgrwg, doek roengz dah bae, swnh raemx dah lae bae. Duzbya iq angq ndoj youq laj dujva youzvetvet, gyoengq mehbaj mehsimj youq henz dah itmienh saeg buhvaq, itmienh angqvau ganggoj, seiz mbouj seiz fat ok sing riugwkwk, duz mahenj ndeu youq henz dah buet bae buet dauq. Gou vid ga vaq, dangh roengz raemx bae, raemx liengzsisi. Rumz yaengyaeng ci, gwnz mbwn roengenq mbinfifi, gyoengqde baez ngeng ndang, couh mbin haeuj gyangmbwn mbouj raen lo. Raemx ranzmbanj ciengx vunz ranzmbanj, gou gyaec raemx ranzmbanj.



Raemx ranzmbanj unqnemnem ciengx ok bya ranzmbanj heusausau. Geij sing byajraez cin yiengj gvaq le, gyanghwnz fwncin laeglemx doek roengz-daeuj. Gyanghaet, raemxdah hwnj sang lo, doenghgo gwn imq raemxcin le, engq heu lo. Gwnz dingjbya goemq caengz mok ndeu, gyaegyaec yawj bae, fwj caeuj mok doxgyaux hoedheux dingjbya, mumjumumj

gyumqgyumq, hoeng, goemq mbouj ndaej bya heusausau.

Youq laj dinbya, miz geij byoz hoengzfwdfwd, neix dwg vadauz hai va lo. Goging hen z mbanj hai va cingq hoenghwd, va saekgyaemq hai ndaej ndei yawj dangqmaz, youq ndaw rumzcin raeujrub youh nyinhcumx neix, limqva loenq rim gwnz dieg. Henz loh bakmbanj song mbiengj, gofaex hung hix cingq maj noengq, de vad gaiqfwngz rengzrwd dongx gou ne! Daswyenz dwg daxmeh raeuz, raeuz itdingh aeu baujhoh ndei de. Geij bi neix daeuj, cwngfuj ok hauilai ngaenzcienz, heuh daihgva baujhoh vanz-ging, lai ndaem gofaex, canggyaeu lajmbanj. Seiz-neix lajmbanj gizgiz heuyau seuqcingh gyaunde lo.

Gou ma ranz, raen doiq roengenq hix gaen ma ranz, gou ngienx gyauej yawj, daxmeh roengenq cingq youq aenrongz caep youq laj yiemhranz ranz gou haenx bwnq lwg de ne.

Vunz ranzmbanj caeuj daswyenz doxndei doxhuz caemh youq, geijlai gyaunde huzndei ha!

(bouxlauxsae son'gyauq Leiz Fwnhlinz)

Lauxsae Gou

贵港市覃塘区蒙公镇凌寺小学六(1)班 Couh Danhyaz/周丹霞

Moix boux vunz ndawsim cungj miz boux vunz boiqfug ndeu, gou hix dwg yienghneix, gou ceiq boiqfug lauxsae gou, de couhwdg Veiz lauxsae.

Veiz lauxsae byoem de ndaem-ndwtndwt, doiqda ronghrik lumj-baenz rox gangjah nei. Moix baez gou guh saeh loek, lauxsae couh yungh lwgda ndatheiq yawj gou, cigdaengz gou ngaem gyauej nyinhloek; danghnaeuz dou guh le saeh angq, song da lauxsae couh riunyumnyum, lumjbaenz yawjraen baujboiq nei!

Gou gingqboiq de dungxcaiz lai. Miz baez ndeu, hwnj dangz-gaghag, gou cingq guh cozyez suyoz, hoeng, miz diuz daezmoeg ndeu gou naemj le hauilai nanz cungj naemj mbouj ok. Gou siengj cam doengzhag ba, youh lau doengzhag mbouj nyienh bang gou, cam lauxsae ba, suyoz lauxsae youh mbouj youq ndaw gyausiz. Seizneix, Veiz lauxsae byaij daeuj coh gou, hozswnh dwk cam gou: “Siujyaz, mwngz baenzlawz lo, bungz daengz gijmaz nanzdaez ne?” Gou suksuk siemjsiemj dwk gangj: “Lauxsae, diuz daezmoeg neix gou mbouj rox baenzlawz guh, naemj le hauilai nanz cungj naemj mbouj ok.” Veiz lauxsae yawj le yawj daezmoeg, naemj yaep ndeu, couh menhmenh ganggej hawj gou dingq. Gou gingqboiq dwk yawj de, yienzlaiz dwg yienghneix guh.



Lij miz baez ndeu, gou dungx in lo, Veiz lauxsae rox le, couh fuz gou daengz bangunhsiz de bae. De gip ndaej lumj duzmoed gwnz rek ndat nei, de aeu raemx daeuj hawj gou gwn, lij seiz mbouj seiz cam gou lai ndei mbouj caengz. Gou han naeuz: “Lai ndei lo. Docih lauxsae!” “Ndei couh ndaej lo, gou yousim yaek dai lo.” Gou dingq le, raemxda sikhaek aeng youq ndaw gvaengzda. Veiz lauxsae raen le, couh lumhlumh aen'gyaeuj gou naeuz: “Lwg huk ya, neix dwg lauxsae wnggai guh, sou couhwdg lwg gou ha.”

Neix couhwdg boux vunz gou boiqfug ndeu, yijvwnz lauxsae——Veiz lauxsae.

(bouxlauxsae son'gyauq Veiz Libingz)

Aen “Suendoengh-duz” Iqet Ranz Gou

贵港市覃塘区蒙公镇古山小学四年级 Veiz Meijyen/韦美燕

Ranz gou lumj aen “suen-doenghduz” ndeu. Gij “doenghduz” ndaw “suendoenghduz” mizyinx lai lo, seizneix gou daiq daihgva daeuj yawjyawj ba.

Daxboh gou couhwdg duz vaiz ndeu, lauxsaed haengj guh, gwnhoj naihaemz. Vih gij gwndaenj ranz dou, de ngoenznaengz ranz caengz rongh couh okdou guhhong, banhaemh mbwn laep liux cij dauq ranz, ma daengz ranz le, lij bang daxmeh guh hongranz, dou moix ngoenz banngoengz cungj gig noix raen de, cijmiz mwh gwn caeuz cij ndaej raen naj de.

Daxmeh gou lumj duz bit ndeu, ngoenznaengz cijaeu dou

youq ranz, de couh lumj duzbit nei “gaga” dwk hemq mbouj dingz: Sij cozyez liux la? Baetbaet aenrug mwngz, daiq dahnuengx bae guhcaemz yaep ndeu daengjdaengj. Deng lo, “duz bit” neix youzraemx ak dangqmaz. Baez ndeu gou caeuj de bae youzraemx, caenh dingq “bu” sing ndeu, mbouj daengz buenq faen cung, daxmeh couh youz daengz baih doiqnaj bae lo, caen lumj duzbit lingzvued he.

Dahnuengx lumj duz douq ndeu, moix ngoenz saetsaet diuq-diuq, coengzlaiz cungj mbouj roxnyinh daengz baeg, “duzdouq” gig gyaec gwn lauxbaeghoengz caeuj byaekheu. Cijaeu daxmeh cawj lauxbaeghoengz caeuj byaekheu, de cungj lumj byajmyig ityiengh vaiqvut buet gvaqbae, dawh cungj mbouj dawz, fwngz iq nyaeb haeuj ndaw bak, gwnguk ndwnj nyaen, gwn ndaej vanj hung bae.

Aen “suendoengh-duz” ranz gou mizyinx lwi? Angqcoux sou daeuj ranz gou guhhek.

(bouxlauxsae son'gyauq Yiz Cungzcih)

